



17. uagust 2012

UKA 2012/173

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Nunatsinni qimussimik nuna tamaat sukkanniutsitsisarneq „Avannaata Qimussersua“ nunatta karsianit ukiumut 500.000,00 kr-nik tapiiffigineqartalernissaanik Naalakkersuisut sulissuteqaqqullugit peqquneqarnissaannik Inatsisartut aalajangiiffigisassaattut siunnersuut (Inatsisartunut ilaasortat Siverth K. Heilmann aamma Knud Kristiansen, Atassut)

Tunngavilersuut:

Kulturikkut ilisarnaaterput qimusserneq ukiut tamaasa nunatsinni pissanngatigineqarluni malinnaaffigilluarneqartarpoq. Oqartoqarsinnaavoq nunarsuup avannaarsuani marlussuinnaasut taamatut sakkortuumik kulturitoqaq aallaavigalugu qimussimik sukkanniunnersuaq ingerlanneqartartut, tamanna inuiaqatigiittut tamatta tamatigut tulluusimaarutigalugulu tapersersugassaraarput.

ATASSUT-mi pingaartilluinnarparput kulturitoqqatsinnik pingaartitsiinnarata ullutsinni nutaaliaasumi aamma avannaata qimussersua aningaasatigut tunngavissillugu nunatta karsianit tapiiffigineqartalertariaqartoq. Taamaasiornikkummi kulturitta eriagisatta ataavartumik tammatsaaliueqataasunit sulissutigineqartuarnissaa aallunneqartuarnissaalu qulakkeerneqassaaq.

Oqaatigisariaqarpoq kommuunit arlallit qujanaqisumik paasinnillutillu tamatigut tapersersuisarmata aamma aningaasatigut, aammalu suliffeqarfiit arlalissuit pingaartitsillutik tapersersuisarput, tamanna annertuumik qujassutissaavoq.

Ilisimavarput taamatut ukiumoortumik aaqqissuussineq angallannikkut oqitsuinnaanngitsoq, pingaartumik aningaasatigut nammanniarneqarnera ilungersunartuusoq. Tamassumalu aamma kingunerisarpaa amerlanngitsut kisimik peqataatinneqarsinnaammata. ATASSUT-miillu isumaqarpugut kulturikkut pingaartitatsinnik kingornussatsinnillu tammatsaaliuineq pinngitsoorata akissaqarfiusariaqartoq. Inuiaqatigiittut toqqammavippu tangilimmik aallunneqassappat.

Tamanna qulakkeerneqarsinnaavoq nunatta karsianiit avannaata qimussersua aaqqissuussisarneq 500.000,00 kr-nik tapiiffigisarneratigut.

Siunnersuutip allaffissornikkut aningaasatigullu pisortanut kingunissai:

Siunnersuut allaffissornikkut pisortanut kinguneqassaaq ukiumoortumik qinnuteqaatit isumagineqartassappat, kiisalu aningaasatigut 500.000,00 kr-nik nunatta karsianut aningaasartuutaasassaaq. Aningaasat kattuffinnut ingerlatsinermut tapiissutaasartuniit tiguneqassappat.

Siunnersuutip allaffissornikkut aningaasatigullu namminersortunut kingunissai:

Siunnersuut allaffissornikkut aningaasatigullu namminersortunut kinguneqassanngilaq.

Siunnersuut allaffissornikkut aningaasatigullu innuttaasunut kingunissai:

Siunnersuut allaffissornikkut aningaasatigullu innuttaasunut kinguneqassanngilaq.